

Sa bidda de Arrolli, chi pigat su nòmini cosa sua de is padentis de arrolli chi unu tempus imboddiant totu su territòriu, est una bidda de 1.929 abitantis.

Bìvia giai de s'època nuràgica, comenti testimoniat sa preséntzia de su Nuraxi e de medas arrastus archeològicus, fàcias a su de VI sèculus at biu su domìniu cartaginesu e a pustis romanu, e de custas preséntzias puru si nd'agatat arrastu in su territòriu.

In s'Edadi de Mesu, sa bidda fuit intrada in su Giudicau de Casteddu e in sa curadoria de Siurgus. Arrutu su Giudicau, in su 1258, fuit passada a su domìniu pisanu e de su 1324 a cussu aragonesu. Cundu is aragonesus iant cunvocau in Casteddu su primu parlamentu sardu in su 1355, Arrolli ddu'iat mandau is rapresentantis suos, ma a bellu a bellu sa bidda fuit decadéssia, fintzas e po mori de sa pesta chi in cussus annus iat furtu a una grandu parti de sa populatzioni. A pustis de sa batalla de Seddori, in su 1409 sa bidda arrennoada fuit andada in cuncessioni a su feudatàriu Francesco Carroz, chi fortzis po dda torrai a populai iat permìtiu s'insediamentu de colonus maurreddinus.

Is aragonesus in su 1604 dd'iant incruia in su ducau de Mandas, chi fuit féudu de is Maza. In època sabàuda sa sinnoria fuit passada a is Tellez-Giron d'Alcantara, e de cussus bìlogada in su 1839 cun s'acabbu de su sistema feudali.

In su territòriu de Arrolli ddu'iat un'àtera bidda, Mulàrgia, chi innantis fuit féudu de is Pimentel e a pustis de is Tellez-Giron.

In dia de oi, Arrolli allogat ancora is domus antigas traditzionalis, cun s'arcu de su portali chi oberit a sa pratza, ingiriada de su magasinu po is provistas e sa corti de is animalis. Su centru stòricu, cun is domus fraigadas in basaltu locali, cun su bixinau de Santu Nigola e su nuraxi omònimu, est assentau in su Repertòriu Regionali de is Centrus Stòricus de sa Sardigna.

Intre is crésias de abbisitai s'agatat sa parrochiali de Santu Bissenti Màrtiri, cun s'ammosta de is paramentus sacrus, e sa crésia de Santu Bissenti Ferreri, fraigada in is primus annus de su 1700.

Àterus logus de interessu funt sa Domu Museu de su Nuraxi Arrùbiu, sa domu-museu-ristoranti Domu Vargiu e "sa Porta o arcu de s'impicu", chi in su 1800 beniat umperada po impicai is criminalis.

Arrolli presentat medas logus de grandu importu archeològicu e naturalìsticu, comente su parcu de su Motti e su Nuraxi Arrùbiu.

In su territòriu suu s'agatant duus lagus artificialis serraus de digas, su Frumindosa e su Mulàrgia.